

# L'oru

Vulia assulià  
I to ghjorni ancu à vene,  
Di sonni arraccamà  
E to notte serene,  
Vulia suminà  
Di centumila stelle  
Sin'à l'alburià  
L'oru di a to pelle.

Vulia induvinà  
I to cenni d'amore  
È ti vulia dà  
U veranu in un fiore  
È vulia intriccià  
À cullane di speme  
L'ore felicità  
Ch'aviamu da passà insieme

U tempu pò spulà  
L'ore cum'è candelle  
Ùn possu sminticà  
L'oru di a to pelle.

Vulia navicà  
Cun tè à core scioltu,  
Gode l'eternità  
D'issu mumentu coltu,  
U tempu si ne và  
È si more ogni stonda,  
Di u mio sunnià  
U vascellu s'affonda.

Mi vurria invintà  
Un antru lindumane  
È per sempre sguassà

Isse ferite landane,  
U vurria smattà  
Issu focu mai spentu,  
Mi vurria scurdà  
Eppuru mi ramentu...

U tempu pò spulà  
L'ore cum'è candelle  
Ùn possu sminticà  
L'oru di a to pelle.